

INSTITUTO DE ESTUDIOS ALTOARAGONESES
DIPUTACION PROVINCIAL DE HUESCA

**A BIDA, A OBRA Y A FABLA
DE CLETO TORRODELLAS**

por

FRANCHO NAGORE LAIN

Huesca - 1981

OTP
2

Publicaciones del Instituto de Estudios
Altoaragoneses, Servicio de Cultura
de la Diputación Provincial de Huesca

El presente trabajo ha sido
elaborado en el Centro de Estudios
de Historia de la Universidad de Huesca

Depósito Legal HU - 170 - 1981
EDITORIAL IMPRENTA PROVINCIAL - HUESCA

R
27127

A BIDA, A OBRA Y A FABLA DE CLETO TORRODELLAS

por

FRANCHO NAGORE LAIN

Huesca - 1981

**BIBLIOTECA AZLOR
INSTITUTO DE ESTUDIOS
ALTOARAGONESES
HUESCA**

1971 a 1972
ESTUDIOS DE INVESTIGACIONES

INSTITUTO DE ESTUDIOS
ALTOANDINO

1981 - 1982

BIBLIOTECA AZLOR
INSTITUTO DE ESTUDIOS
ALTOANDINO
HUBO

A BIDA, A OBRA Y A FABLA DE CLETO TORRODELLAS

Por FRANCHO NAGORE LAIN

(D'o Consello d'a Fabla Aragonesa)

CLETO TORRODELLAS. A SUYA BIDA

CLETO Torrodellas escribié en 1934 una chiqueta autobiografía que tetuló *Mi vida*. L'en mandó à Luis Mur, profesor en l'Instituto de Uesca, con ocasión d'imbiá-li bellas poesías. Luis Mur publicqué un poqué más tardi un triballo sobre Cleto en a rebista «Aragón» ¹, reproduzindo antiparti o poema *El banco viejo de los viejos*. Ixe artículo ye por tanto, por as fuens de primera man de que se sirbié, uno d'os más fiables. Atro buen conoxedor de Cleto Torrodellas, Antonio Quintilla, sigue tamién en os suyos triballos a narración autobiográfica y por tanto coinzide con Luis Mur. Os demás autórs (que se pueden beyer en a bibliografía de dezaga) parixen menos fiables en os datos y notizias: mesmo bella bez son contraditorios

1. *Cleto Torrodellas Español*. "Aragón", Zaragoza, febrero 1936, pp. 37-38.

(aberba qu'eszibí-ne à Pablo Cistué, que conoxié en presona à Cleto y charró muitas begadas con er, pero que, sin dembargo, no aporta muitos datos concretos) ².

Istas son as fuéns—chunto con unas chiquetas notas que me proporcionó una nieta de Cleto—que sigo ta embastar un poqué a bida de Cleto Torrodellas.

Naxié en Estadilla en l'año 1868. O día y o mes esautos no los recuerdan os suyos familiárs. Yera o segundo d'os catorze fillos (d'os que murieron cuatro) d'una d'as familias más pobras d'o lugar.

O suyo pay triballaba la tierra y fendo un gran esfuerzo fazié que Cleto podese ir ta la escuela. Pero no i-fué muito; la dixó à os doze años y se metié à aduyar à o suyo pay en as fayenas d'o cambo. Teneban unas faxetas en a sierra. Cleto ricuerda mui bien d'ixa epóca as parolas qu'un día li dizié o suyo pay, cuan chentaban debaxo d'un caxico: «Este mundo é una mentira...; nusatros, aquí con un puchero patatas y un trocé tocino mos alimentán y fartos de treballá, y sin embargo, ñ'hay que no fan res y son los que comen milló. ¡Qué injusticia!».

Triballó en os quefêrs d'o cambo dica os 16 años. Allora o suyo pay li proponié que prenese bel ofizio, metendo-li à triballar en a ferrería d'un amigo. L'ofizio de ferrero ye con o qu'ha pasáu à la istoria (encara uey cuan nombran a casa suya la claman «Casa'l ferrero»).

Li tocó dimpués fer o serbizio melitar, destináu en o «Regimiento de Castillejos número 18». Dimpués de rematar a instrución pasa à la «Escuela de Herradores», d'Alcalá de Henares. Astí bi-ye unos meses, fa un esamen y lo imbían ta Barzelona, en do fa lo

2. Informazións de primera man son tamién as que proporciona PACA SANCHO en *Lo que me ban contá de Cleto*, en "Fuellas", número 9, mayo de 1979, pp. 6 y 16. Sin dembargo, como prozeden de remeranzas d'a chen d'Estadilla, son indreitas y prou lexanas.

resto d'o serbizio como ferrero d'o «Regimiento de Lanceros del Príncipe»³. Os SUPERIÓRS l'aconsellan renganchá-se como mayestro ferrero con paga de sarchento, pero no l'azeutó.

Dimpués de lizenziá-se trobó triballo en casa d'un mariscal (u albéitar). Encara ye en Barzelona dos años, pero teneba nobia y quereban establezé-se en Estadilla. Asinas que torna t'o lugar, compra una biella enclusa y continua exerzendo l'ofizio de ferrero. Teneba la ferrería en o que yera camín — uey ye carretera — d'as afueras d'o lugar. En o suyo quefer l'aduyaba o suyo chirmán José y os dos fillos d'iste.

Sin dembargo, à poco de casá-se, en 1894, con ocasión d'a guerra de Melilla, claman à tres quintas y Cleto tenié que marchar atra begada «à serbir». A situación en Melilla espaza ascape, asinas que mandan à tóz enta casa y Cleto torna lugo à o suyo triballo de ferrero, fendo-se poqué à poqué con aclientela d'Estadilla. Ya no salirba más d'o lugar, fueras de bellas curtas besitas à Zaragoza y à Barcelona. Tenié tres fillos; morié o mozé mayor y li quedaron dos fillas.

Cleto triballaba muito en a ferrería y como no teneba una constituzión fesica muito fuerte cayeba enfermo à ormino. O médico l'aconselló dixer l'ofizio de ferrero y adedicá-se à un atro quefer más lixero y menos duro. Asinas que dixó lo mallo y a enclusa, a ferrería l'en traspasó à o suyo chirmán mayor, y metié un salón de baile y una botiga chiqueta. Allora teneba 26 años. Un poqué más adebán un señor d'o lugar l'ofrexe l'almenistración d'a casa suya. Paca Sancho da más datos (se beiga o triballo cuaternáu en nota 2): «se mete como mayordomo en una casa del llugá, casa Heredia, en don teniba menos faena y podeba escribí más. Y en este traballo pasa el resto de la bida suya».

3. Isto ye d'aluerdo con o que dizen A. QUINTILLA y L. MUR. Sin dembargo, M. A. ARTAZOS, asegura: "El único viaje "largo" de su vida lo hace a Zaragoza, movido por un fervor religioso y por el deseo de conocer a su gran amigo de correspondencia "Mefisto". Cleto, en *Relazións al natural* da a entender, ya que parixé autobiografica, que fa o serbizio melitar en Zaragoza; Bi-ha que pensar que ye una mera fización. Antiparti, n'una composición en castellano. *Un viejo lugareño a Zaragoza*. d'el qu'en 1888 conoxié por bez primera Zaragoza, serbindo de soldáu; isto sí ye compatible con os atos datos.

Tóz coinciden en señalar que feba una bida senzilla y tranquila: triballaba l'ortal y aprobeitaba tó lo tiempo que podeba ta escribir romanzes, que dimpués en bendeba impresos en as fiestas u rezitaba. Ye prezisamén en istos años, entre 1900 y 1933, alto u baxo, cuan escribié os romanzes más importáns y conoxius. Cleto siempre confesó una gran afizión por a poesía, pero, à o mesmo tiempo, se quexa de no poder presentar os bersos «más refináus». Anque iste tema lo tocaremos más amonico en charrar d'a obra suya, cal que toquemos tamién aquí iste punto. Escribiba cuasi siempre en ribagorzano, anque tamién escribié bellas cosetas en castellano. Ista ye a esplicazión que mos ne da: «el hazerlos en Ribagorzano es porque tengo más campo de salvación, pues en castellano los hago pero me viene más ancho y por eso me firmo «El Poeta Silvestre».

Muitos romanzes y coplas suyas han pasáu à la tradizión oral, pus bellas presonas d'a redolada encara los rezitan de memoria. Ye tamién menester señalar qu'una fábrica de carambéis de Balbastro meteba trozéz d'os bersos suyos en os papéls que serbiban ta embolicar os carambéis. Isto ye un dato interesán d'a suya fama popular.

En as añadas zagueras d'a suya bida estié representán u «agente» de l'Azucarera de Monzón.

Respeutibe à o suyo aspecto físico tenemos una descrizión, un tanto ideyalizada, d'una presona que lo conoxié, Pablo Cistué, qui mos diz: «Su semblante tenía cierta semejanza con la imagen del dios Vulcano... Tenía el perfil alargado, como el de los hidalgos del Greco, la frente despejada, los ojos del color de las moras silvestres, con reflejos de místico o de alucinado, la nariz aguileña y una barba de guedejas rizosas y rojas que blanqueó con el paso del tiempo. Su físico no podía estar más en consonancia con su noble oficio de herrero» ⁴.

Cleto iba siempre, ise ta do ise, con un trozé de papel y un lapizero, ta poder escribir. En do li s'ocurriba, astí feba os bersos. Teneba fazilidá ta bersificar y, por o que se cuenta, en teneba también

4. "Heraldo de Aragón", 24 septiembre 1978.

prou de grazia. Sin dembargo, fueras d'escribir poesías, que como emos dito yera una d'as afizións que más aimaba, y de l'aprezio que a chen li fese d'os suyos escritos (no pas siempre; muitas begadas l'aplaudiban y animaban, pero bella bez se l'en rediban), no en tenié muitas de satisfazións en a bida suya. O relato curto d'a suya bida lo remata asinas: «...esperando que llamen para marchar a donde van los pobres, yo creo que a la Gloria, ya que en este mísero mundo no hemos podido gozar de ella».

Dimpués d'una larga enfermedá de siete añadas, morié o 7 de mayo de 1939 (o 9 de mayo, que gosa dá-se como calendata d'a suya muerte, ye d'o día en que l'apedecoron). Por tanto, s'han feito en 1979 cuarenta añadas d'a suya muerte y ziento onze d'o suyo naximiento.

Faint, illegible text at the top of the page, possibly a header or introductory paragraph.

Second block of faint, illegible text, appearing as a separate paragraph.

Third block of faint, illegible text, continuing the document's content.

Fourth block of faint, illegible text, showing further progression of the text.

Fifth block of faint, illegible text, likely a concluding paragraph or section.

Sixth block of faint, illegible text at the bottom of the page.

A SUYA OBRA

A obra de Cleto Torrodellas se compone de bentitantos romanzenes y poesías en aragonés ribagorzano. No en son muitos, aunque siempre bi-ha posibilidáz de qu'aparixca beluno no conoxíu. En concreto, parixe qu'en teneba beluno, feito en plan festibo u bori-nero, que à la suya familia li parixeba irrespetuoso y ha preferíu no conserbá-ne. Tamién bi-ha que parar cuenta que si a suya produzi-ón no ye mui ampla en número de composizi-óns, sin dembargo bels romanzenes son prou largos: asinas, *Relaci-óns al natural*, «Romanze de Martín y Pascualeta», tien 426 bersos, y o tetulato *Al-vertencias*, 180.

Antiparti escribié tamién unas quinze composizi-óns en castellano, entre as que destacan: *A la ermitaña de la sierra*, bersión en castellano de *A la armitaña de la sierra de la Carrodilla*; *El sueño dorado*, sinificatibo porque astí beyemos prou bien reflexadas as suyas barucas, a suya preocupazi-ón de no saper escribir en castellano:

*«No sueños tan por arriba,
quédate un poco más bajo,
confórmate con hacer
versos en ribagorzano».*

Un viejo lugareño a Zaragoza, en do tamién se pueden beyer belunas d'as suyas cutianas ideyas:

*«Bendice, madre querida,
mi pobre composición;
si con tu mano piadosa
le echas la bendición
mis coplas no serán malas
ni tampoco la oración».*

El charlestón se apodera de España, en do beyemos o suyo pensamiento de que tó lo nuevo (menos a fabla castellana) ye malo: contrapone os bailes tradizionáls à o charlestón, y diz que, en Aragón, ta no desairar à la Pilarica, bi-ha que dar guerra à o charlestón y bailar a jota.

Atros tetúlos en castellano que se podeban cuaternar:

La honra no tiene precio, El alpargatero de mi pueblo, Súplica a la Virgen del Pueyo, Así lo siento, Pensamientos del hombre del terruño, etz.

* * *

A obra en aragonés de Cleto partizipa d'as mesmas carauterísticas que se beyen en a obra en castellano, si bien s'azentuga muito a temática local (en cheneral, os temas en castellano no son locáls), a temática pastoril u bucolica, y o tema d'as asperanzas y quefés d'a chen, que trata menos y siempre ye relacionáu con a suplica à la Birchen u con as fiestas de San Lorenzo. Antiparti, aparixen tamién as suyas barucas u turrunteras más comunas: a poesía, o complexo d'inculto y de no saper escribir bien en castellano, a balorización d'as tradiziós frén à o nuevo, l'etnozentrismo, a ideya de que «cualsquier tiempo pasáu estió millor», etz.

Asinas, podebanos fer un curto analís y clasificazió d'istas ideyas y temáticas que predominan en a obra suya.

a) *A temática local*. Cuasi tóz os suyos bersos, menos os que tratan espezificamén d'o quefer de poeta u coplero, se podeba dizir que son de temática local. Pero quizáu se podeba meter como exemplo *A San Lorenzo, patrón de mi pueblo*. Tamién son mui interesáns en iste aspecto os adedicáus à lugárs d'a redolada, como à os de Graus, à os de Fonz, etz.

a1) *Etnozentrismo*. Puede dizí-se que a temática local conleba en muitas d'ocasións un furo sentimiento etnozentrista que, por o que se bey, ye biello en os lugárs altoaragoneses y encara uey se manifiesta fuertemén. L'exemplo más típico ye *Contestación a los de Fonz* (encara uey existe iste enfrentamiento mutuo entre a chen d'Estadilla y a de Fonz).

a2) *Presenzia cutiana de San Lorenzo y a Birchen d'a Carrodilla*. Com'una consecuenzia más d'o localismo y 'etnozentrismo, os patróns d'Estadilla aparixen mui à ormino en os bersos. En os que más platero ye isto, son: o ya cuaternáu en a), *El San Lorenzo de hoy, Diez días antes de San Lorenzo, Supplica de un obrero a la Virgen, En la Carrodilla*, etz.

b) *Temática pastoril y bucolica*. À ormino aparixe a pastora, a «serrana» u «llugareña» n'un ambién d'idilio (*Relacións al natural*, que belúns han clamáu «eglóga», *Felicitación*), u n'un ambién natural y montesino, que se concara con l'ambién urbano (*El retratista en l'aldea, A la armitaña de la Sierra de la Carrodilla*).

c) *Emponderamiento d'o tradizional*. Sobre tó en o respetutibe à fiestas y romerías, y en o respetutibe à la moral y as costumbres. Tamién aquí se concara o tradizional, y o rústico y montesino, con o moderno, as modas urbanas, etz. Se bey prenzipalmén en: *Las mares y las fillas, El beso de amor, Alvertencias que tenín que oservá en los santuarios, El San Lorenzo de hoy*, etz. Mesmo disprezia l'«ixiene», porque ixo ye una moda urbana y nueba, como se bey n'unos bersos en castellano tetulatos *Yo no vengo a Barcelona*:

«Lavarme me lavo seis veces al año,
y esto ha de ser en pleno verano.
No es que sea sucio, no señor,
pues iré muy limpio por el interior».

d) «*Cualsiquier tiempo pasáu estié millor*». Ye un tema en-religáu con o debandito: o tradizional, o d'antis más, ye o bueno. O d'agora, si no ye malo, por o menos no ye tan bueno (*El San Lorenzo de hoy*). Sin dembargo lo tema no sólo afeuta à la soziedá y as costumbres, sino tamién à o presonal u esistenzial: allora os bersos se chupen de ricuerdos u de reflesións sobre a biellera, como en *La vida de mocé* y *El banco viejo de los viejos*. Se considera iste zagüero romanze como uno d'os millórs y más famosos.

e) *O complexo d'inculto, de montesino*. Se manifiesta sobre tó en as autodenominazións que s'atorga. Mui à ormino firma como «Poeta silvestre», y tamién aparixe en os bersos ista «embotada» u

atras aparixidas como «poeta del terruño». Asinas, en *Mis versos tienen miedo a marchar* se clama «siñó Cleto, silvestre poeta», y acompaña os suyos bersos a «fllos llamadas silvestres» que «se crían al peu d'un peñón», y qu'unque «sin podá, sin riego y sin jardineiro», «lleven aroma y tiran oló». Igual se bey en a carta *A D. Cristino Gasos*:

*«Si el poeta silvestre
que s'atrive a molestalo...»*

Y sobre os suyos bersos:

*«Yo no los sé fé medidos
ni los foy en castellano».*

Cuan escribe á *l'Heraldo de Ribagorza*, en chulio de 1927, diz:

«...ma dau la ocurrencia de escribible, pa dile que si le fa juego algo de lo que yo foy, podría llenale algún trocé de diario, lo cual l'envío una muestra; ya berá aon llega el mio saber, pos aunque to seiga rabia, un home que no á'studiáu, gran cosa no puede fé».

A duda d'a calidá d'os suyos poemas por a «falta de cultura», ye una ideya fixa que se repite en muitas d'ocasíons:

*«Como no'stoy ilustrado
y los foy tan llugareños
no sé si ixe siñor
los fará pasá per buenos».*

(Siñorico M. D. Bardají).

*«Aunque'l rustico poeta
no sabe ben esplicá».*

...(A San Lorenzo).

Cuasi se puede dizir que plega à tener complexo por no saper escribir bien en castellano, como se bey en *El poeta del terruño*:

*«Desde que s'estienden tanto mis escritos
no me paro de pensá
qué dirán los que veigan estos versos
con estas modas tan raras de hablá».*

* * *

*«que soy un pobre home del terruño
sin estudios de ninguna calidá»*

* * *

*«Pero, pobre de yo que con mis afáns,
mis deseos y mi buena intinción
escasamente valen mis escritos
pa este rinconé del Alto Aragón».*

Tó iste romanze entero ye muito sinificatibo n'iste aspecto: conoxeba, y ademprabiaba, as suyas limitazións, pero li penaba por ixo.

f) *O complexo de charrar ribagorzano.* Iste ye un aspecto chunú de raso à l'antebán. Ye berdá que yera mui conszién d'as suyas limitazións, pero tamién teneba conzenzia platera de qu'escribiba en ribagorzano, no pas en castellano. Os exemplos son mui numerosos:

*«Estas van escritas en ribagorzano,
como así se habla en nuestra región».*

(Oración en el aniversario de Costa).

*«Yo no los sé medí ben
ni felos en castellano;
pero el Santo ya lo'ntiende
el hablar ribagorzano».*

(A San Lorenzo).

...«Yo no sé hablá en castellano
ni medí como un poeta...»

(Graus y «El Ribagorzano»).

«Si no, hable como nusatros
el puro ribagorzano».

(El retratista en l'aldea).

...«Al dirigitos estas lletras
como hablán nusatros».

(El poeta del terruño).

Sin dembargo, ixa platera conzenzia de fabla no yera positiba, pos escribir en ribagorzano tamién li parixeba poco culto y de poca categoría:

«Perque aunque seigan silvestres,
mal medidos y rimados,
y carezcan de cultura
per está en ribagorzano...»

(A D. Cristino Gasós).

Ye dizir: a suya baruca cutiana ye no poseyé-ne guaire de cultura, y ixo lo creye una limitación, pero charrar ribagorzano lo considera una limitación más, un punto negatibo más.

En reyalidá se puede deduzir d'isto que charrar ribagorzano ye consustanzial con a falta de cultura. O cualo no fa sino amostrá-nos cómo ye asumida—n'iste caso de forma mui conszién—a ecuación *fabla aragonesa = incultura* y bizibersa. Anque tóz sape-mos qu'isto formaba parti d'as pautas culturáls impuestas por as napas «altas».

Dimpués de tó lo dito parixe una escontradizión qu'escribise tamién en castellano, n'un castellano correuto. Bi-ha que pensar talmén que n'istos casos interbenié bella man culta, como dixá entrebeyer cuan diz:

*«Perqu'esto é muy triste, queridos poetas,
que me sente a fé una poesía
y que tenga que llevala al siñorico
pa los puntos, admiraciós y ortografía».*

(El poeta del terruño).

Sin dembargo tamién aparixen bels trozéz en castellano en a suya obra en ribagorzano. Asinas, en *El banco viejo* à San Pedro y à o rico los fa charrar en castellano, y en *El retratista en l'aldea*, o retratista, ome de zidá, charra en castellano. Astí me decanto à creyer que no lo fazié aldrede, sino que ye un reflexo incoszién d'a identificazió d'o castellano con a fabla d'a zidá, d'o poder y d'os dinérs. ¡Y qué identificazió tan fundamén ficada en o suyo zelebros teneba qu'está-ne, ta no premití-le fer charrar à San Pedro en ribagorzano. Podié fé-lo aldrede, pero, en cualsiquier caso, porque no beyeba atra soluziós reyál.

En resumen, podebanos dizir que o pensamiento suyo que chupe tós os bersos son un conchunto d'ideyas simplas y senzillas, no mui triballadas, que reflexan una bisión d'o mundo tradizional y conserbadora, propia d'un ambién rural de fa 50 u 80 añadas. Ye dizir: cal estar mui bueno y deboto, cal triballar muito, aconortá-se y dar grazias à Dios — y sin dembargo muitas bezes fabla d'a bida dura y cada día peyor d'o labrador y d'o triballador —, bi-ha qu'obedexer y onrar à os pays. Por contra: tó lo nuevo y moderno ye malo, a chobentú ba tresbatida ademprubiendo modas foranas... Sin dembargo bi-ha una gran escontradizió: charrar castellano — que tamién yera una moda nueva y forana — no ye malo, sino tó lo contrario, mientras que charrar ribagorzano — que ye o tradizional — ye fiero e inculto (=ye malo). Por tanto, si mos ha dixáus unos cuantos bersos y romanzes escritos en ribagorzano ye porque no lo sapeba fer d'atra forma. Uey mos interesan porque son prezisamén en ribagorzano. ¡Qué gran paradoxa! Y qué tristeza beyer por istos testimonios qué fundo lis eban ficáu à las chens altoaragonesas l'odio por a suya fabla.

Sin dembargo, a bida ye un cutiano miraglo: uey en Estadilla se continua charrando l'aragonés ribagorzano y buena preba d'a bitalidá estié l'omenaxe à Cleto Torrodellas que se fazié en ixé lugar o día 19 de mayo de 1979⁵, auto en o que sólo se charró en ribagorzano y en o que os que lo feban, y a más gran parti d'os qu'ascuitaban, yeran chóbens.

Quiero rematar as considerazións sobre a obra de Cleto remorando cómo à ormino se l'ha acomparáu con bels poetas meyebáls. Asinas, a senzilla y popular debozió'n qu'amuestran os bersos adedicáu's à la Birchen d'a Carrodilla fan qu'uno s'alcuerde de Gonzalo de Berceo. En atros intes, a presenzia d'a *serrana*, ya siga pastora u armitaña, y o mesmo tono d'os bersos, mos recuerdan as «serranillas» d'o Marqués de Santillana. Y bels bersos, como ros d'o romanze *El banco de los viejos*, tienen muitas semellanzas—unque, si se quiere, n'un estilo más rozero y popular—con bellas estrofas d'as *Coplas* famosas de Jorge Manrique, en do fabla de temas típicos d'a literatura meyebal, como a igualdá debán d'a muerte.

Ye berdá que os millórs bersos los fa cuan describe a naturaleza y o paisache, u cuan a esprisión d'os sentimientos la fa por meyo d'o reflexo en a naturaleza. (*En la Carrodilla*, bels trozéz de *Relazións al natural*, etz.), u cuan espresa un inchenuo sentimiento popular (*Felicitación*, etz.). Y ixé zello de ruralismo que chupe toda la suya obra fa que Nicolás S. de Oto lo clame «poeta ignoto», «juglar abnegado», y fable d'a suya «ruda poesía» acompará'ndolo à Jorge Manrique; y A. Quintilla fable d'os suyos romanzes «tan frescos como la sierra misma», d'a «vuelta a lo primitivo», d'a «intervención de lo popular», d'os bersos que tienen «la grata fragancia de los Cantares del Marqués de Santillana», y de que «el realismo de Cleto es el del Mío Cid». Son sólo qu'unos exemplos.

Istas comparanzas con os poetas meyebáls castellanos nos dixan beyer cualcosa interesán que no debemos dixar amagada: dende una güellada oxetiba cal almitir que o chiquét desembolique literario de l'aragonés feba que en a primera mitá d'o sieglo xx se

5. Se beiga "Fuellas", número 10, p. 2.

trobase a literatura en aragonés — por o menos en bels aspeutos — à un ran parellano à o d'a literatura meyebal castellana. Claro que no sirben ta muito comparanzas d'ista traza, pus as zercustanzias yeran mui diferéns. Sin dembargo, cal que paremos cuenta qu'iste desfase u retraso en a literatura se manifiesta tamién en o mesmo desembolique y estruturazió'n d'a fabla y d'una forma cheneral en cuasi tóz os cambos d'a cultura en aragonés. Ye por ixo por o que agora mos trobamos, por exemplo, con a coesistenzia d'una poesía popular que parixe cuasi meyebal, con una poesía de tipo romántico y mesmo con una poesía moderna más u menos experimental. Y cal dizir que n'iste inte no mos ne sobra denguna.

Faint, illegible text at the top of the page, possibly a header or title.

Second paragraph of faint, illegible text.

Third paragraph of faint, illegible text.

Fourth paragraph of faint, illegible text.

Fifth paragraph of faint, illegible text.

O BAXO-RIBAGORZANO. A FABLA D'ESTADILLA

O tipo d'aragonés que se fabla en Estadilla ye o baxo-ribagorzano. Ye mui parexíu à o grausino y partizipa d'as carauterísticas de l'aragonés de Ribagorza. No s'ha feito encara un estudio fundo de l'aragonés charráu en Estadilla, cosa que serba prou interesán por a suya situazi3n. Sin dembargo, los escritos de Cleto Torrodellas ofrexen un material de primera man ta embastar unas chiquetas notas que à o mesmo tiempo que pueden estar un primer amanamiento à l'estudio de l'aragonés local d'Estadilla, puedan serbir tamién ta leyer con millor aprobeitamiento as obras d'iste autor.

a) *Aspeutos fonéticos.* — En primer puesto cal señalar que ya en o primer terzio d'o sieglo xx, seguntes podemos beyer en os bersos de C. Torrodellas, yeran cheneralizáus muitos castellanismos fonéticos. Palabras sinificatibas qu'aparixen siempre con fonética castellana son, por exemplo: *viejo, dicho, llueve, escuchá, noche, ojos, mucho, lejos, drecho, cajas, monte, etz.*

Tamién por contra, se beyen catalanismos fonéticos, anque en menor cuantía, que uey se siguen emplegando y que parixen debése à un sustrato autotóno, no pas à importazi3n como en o caso d'os castellanismos. Exemplos: *ben, tamé, peu, bou, mare, aigua.* Mesmo se beyen bellas palabras de tipo lesíco catalán como *may 'nunca'*. Sin dembargo, a manca de diptongazi3n en as formas berbás (d'o tipo de: *almorzes, m'acordo, sonen, chugan, etz.*), creigo que se debe esplicar por o papel que chuga l'analoxía en a conchugazi3n, ya que, antiparti, se troba en l'aragonés d'atras redoladas muito más ozidentáls. Fueras d'istos casos cuaternáus, a diptongazi3n se fa siempre de modo normal (exemplos: *fiestas, suerte, quiero, diez, etz.*), mesmo debán de yod, como ye propio de l'aragonés (*tiengo, tienga, vienga*). Anque no aparixe en o berbo *ser*: *é = ye, es = yes*, como se beyerá dimpués, en qu'analizemos a conchugazi3n.

Seguindo con a fonética, bi-ha que resaltar dos fenómenos, comuns en Ribagorza:

A palatalización de *l*, d'a que trobamos muitísimos exemplos. Ocorre en situación inicial: *llastima*, *llorceta*, *llimpia*, *llevá*, *lluego*, *llibro*, *llugá*, *llgrimas*, *levantá*, *lletra*, *llumbre*, *lleña*, *llengua*, *llargo*, etz. Pero tamién en situación interior entre bocáls: *relluce*. Y tamién ocurre cuan a *l* fa grupo con atra consonán; en iste caso lo que se bey más à ormino ye a palatalización en o grupo PL-: *pllorá*, *pllaza*, *pllata*, *pllana*, *pllaga*, *supllica*, *sopllamocos*, *empleado*, *espllicá*, *destemplado*, *respplandece*. Y en o grupo CL-: *cllara*, *cllaridá*, *escllamá*, *escllafá*, *cecllada* (en iste zagüero caso ye anti-etimoloxico). Pero tamién en otros grupos: *abllandá*, *blanco*, *arreglle*, *fillos*, *floja*. Y mesmo dezaga de *r*: *burla*.

L'acotolamiento de *-r* zagüera, en todas as palabras. Asinas, trafegan a *-r* tóz os infinitivos (ex.: *rezá*, *llevá*, *fé*, *corré*, *agradá*, *embudidá*, etz). En cuanto à os sustantivos, tamién s'en troban exemplos à ormino: *mullé*, *altá*, *sudó*, *oló*, etz. Bella eszeución: *favor*.

Atra custión señalable en a fonética podeba estar o zarramiento d'a bocal *a* debán de *i*, cosa qu'ocurre en bellas formas berbáls, quizáu influyenziatas por o presén de suchuntibo d'o berbo *ser* (*seiga*). Os exemplos que s'en han trobato son: *heiga*, *heigáz*, *heigán*, *feiga*, 'faiga', *veigámos* 'baigamos' ". Respeutibe à iste zagüero exemplo cal señalar un caso d'omofonía que no se troba en atras redoladas: *beiga* y *beigáz*, por exemplo, pueden estar d'o berbo *beyer* u d'o berbo *ir*, següentes o contesto.

En cuanto as contrazións, que reflexan en a escritura la pre-nunzia popular, as qu'aparixen más à ormino son: *pe'l* 'per el', *d'un* 'de un', *com'un* 'como un', *como'l* 'como el' / 'como lo', *to'l* 'to el' = 'tó lo' / 'tos lo', *mo'l* 'mos el' = 'mos lo'

Se beyen bels casos de protésis, metendo una *a*- debán: *alle-gá*⁷, *arremata*, *atreballados*; u metendo lo prefixo *en-*: *emponderá*, *encllabáu*, *encostipá*, *endintro*, *enrabiar*.

6. Un caso parellano de zarramiento de *a* ocurre en a Bal de Chistáu, anque no pas en os verbos: *güaire* 'guaire'.

7. Igual ye en a Bal de Chistáu, con fonética castellanizata d'o grupo *pl-*.

Os dobles de formas afeutan tanto à la fonética como à la morfoloxía y mos señalan en cheneral castellanismos, anque tamién, bellas bezes, formas diferéns que combiben en l'aragonés d'Estadilla: *hablá / habllá, había / heba, hombre / home, aquels / aquellos, alguna / bella, gente / chen, todos / toz, otra / un otra, é / es, feito / fey, vaz / iz*. Os exemplos d'iste zagüero caso dixer beyer muito bien l'alternanzia de formas: *si tos n'iz a Barcelona; vusotros vaz empezá; porque así iz más fresquetas; to la vaz a buscá a Naval; si baz a algún santuario / iz a misa y al sermón; ya que per fuera iz / demasiáu espechugas*.

Y en cheneral, tóz os casos mos amuestran os efeutos que causa la falta de normalización.

b) *Aspeutos morfoloxicos*.—Siñalemos, en primer puesto, a buena conserbación d'os pluráls en -z, no pas sólo en os verbos (*compráz, diréz, culliz, levantéz, pensábaz*, etc.), sino tamién en os sustantivos: *corréz, quartéz, mozéz, pastoréz, retoñéz*.

Tamién os pluráls formáus con -s dezaga de consonán (o típico de l'aragonés) s'emplegan cuasi siempre: *fllos, pastós, caferróns, mullés, relazións, violóns*, etc.

Drento de l'alpartáu d'o plural cal señalar que *chen*, como co-leutibo, concuerda con verbo en plural ⁸: *lo que la chen leeban con agrado; la chen miran y miran*.

Os artículos, como se beyerá en os poemas, coinziden en a suya forma con os castellanos, sin que se pueda asegurar si son propios u ampráus.

Os pronombres presonáls son: *yo, tú, él, ella, nusatros, -as, busatros, -as, els, ellas*. Bella bez se bey escrito *ells* en puesto de *els*.

As formas d'os pronombres de complemento dreito e indreito son, como se sape: *me, te, el / lo, la, mos, tos, las*. Exemplos: *qu'el ba vé, cuan Pascuala'l va sabé, no te'l heba contáu, tos la fez, mos los fa, to lo podez pensá, to lo foy presente, mo'l quiere dí = mos el quiere dí 'mos lo quiere dizir'*. Asinas, d'igual traza que *mos + el = mo'l, tos + lo = to'l / to lo y tos + ne = to'n / -tone*.

8. Tamién e replegáu exemplos d'isto en Pandicosa: *otra chen fan*.

Sobresale a construción de complemento dreito más complemento indreito, en tercera presona, que se fa como en grausino y atras bariedadáz ribagorzanas:

	aragonés común	castellano
<i>lo ye</i> <i>la ye / la y</i> <i>los ye</i> <i>las ye</i> (seguntes o chenéro y o número d'o complemento dreito).	<i>l'en u les ne</i> (seguntes o complemento indreito siga sing. u pl.)	se lo se la se los se las (seguntes o chenéro y o número d'o complemento dreito).

Ye claro que *lo ye* = lat. *illud illi*.

Exemplos: *compraz el romance / y enseñázloye a los fillos; luego los ye esplicaré; que las ye cantaba un día; las ye escuchaba.*

Tamién s'emplega la construción *le'n* pero parixe que más bien tien o sentíu de 'le, de ello': *tres le'n va podé aprendé 'tres le pudo enseñar (de ello)'*.

En os demostratibos será prou con cuaternar as formas:

esto, estes, estas.

ixe, ixa, ixo, ixes, ixas.

aquel, aquéls, aquella, aquellas.

Exemplos: *a toz estes llugaróns 'a toz istos lugaróns'; y conserben estes bancos 'y conserben istos bancos'; per ixes mundos 'por ixos mundos'.*

En cuanto à os indefiniús, de contino aparixen as formas castellananas *algún, alguna*. Sin dembargo s'han replegáus unos cuantos exemplos de *bel* y *bella* en os poemas: *pa'screbimos bella carta; gastale bella brometa; el que trove bella falta; bella sardina; bel traje; ya han engatusáu bel Mariano u bel Antonio.*

En l'indefiníu *otro* cal señalar o suyo empleo con l'artículo indetermináu: *un otra segunda parte; cuan feiga un otro romance* ⁹.

Os complementos pronominalo-alberbiáls s'emplegan à ormino, con diferéns formas seguntes o contesto. Exemplos de *ne, en*: *en mandaría a «La Tierra» / más de doscientos al año, no ñ'hay = 'no en-i ay', cuantas ne conozco yo; si querez sal to'n compraz 'tos ne compraz'; penso 'scribine mientras viva; y quizás n'escriba más allá.*

Con verbos de mobimiento: *venítone 'vení-tos-ne', s'en va, tos n'iz, se'n vendrían, etz.* U reflexibos: *se'n reiba.*

Exemplos de *bi, i*: *tres años que y'han d'está, pa res se'y pueden posá, u y' está la boira preta, casi no'y puede pasá, qu'allí y manan doce caños, que tantisma chen y'acude, que se'y vey más de diez pueblos, hasta se'y quieren casá, porque y vaz a divertitos, sólo se'y va pa rezá, luego y'está aquel Madri, si sudas no y'estés guaire.* Como se bey, siempre emplega C. Torrodellas a grafía *y*. Bellas begadas aparixe a forma *ye*, cuasi siempre dezaga d'o berbo: *ya pueden posaye'n dentro, a los dos meses d'estaye 'd'estar-bi', hora ye va poca chen 'agora i-ba poca chen'.* En bella ocasión puede tener o matiz de 'allí en ello': *no mo'y tenín qu'empeñá.*

En a conchugación cal señalar sobre tó bellas trazas ribagorzanas típicas:

—A conchugación perifrástica d'o perfeuto u indefiníu: *va queré Dios 'querié Dios', se'n van í a paixentá 's'en fueron', se le va posá un coló 'li se metié', te va enviá 't'embió', vas aparecé 'aparixiés', van está 'estieron' etz.*

—A primera presona d'o plural d'os verbos, que ye siempre, en tóz os tiempos, alcorzada: *sabén 'sabemos', tiengán 'tiengamos', acudiban 'acudíbanos', cullín 'cullimos', tenín 'tenemos' in 'imos', hen 'emos', ganán, tornarén, comerén, vivirén, verén, etz.* Anque bi'n ha bellas eszeuzións: *veiyamos, hemos, semos, etz.*

—O cherundio, tamién alcorzáu siempre, ye dizir, sin a zaguerá silába, tal como ye carauterístico d'o ribagorzano: *cumplin*

9. Esta construción s'emplega tamién, de modo regular, en l'aragonés d'a Bal de Chistáu y d'a Bal de Benás.

'cumplindo', *pllorán* 'plorando', *fen* 'fendo', *sen* 'siendo, estando', *ven* 'beyendo', *in* 'indo', *imaginán*, *oserván*, etz. Tamién beyemos a mesma forma d'o cherundio con pronombres enclíticos: *pedinle*, *escuchanlas*, *espendense*, *convidánmos*, *morínse*.

—L'imperfeuto d'o indicatibo d'o berbo *ser* trafuca la suya forma con a d'o imperfeuto d'*aber*. Asinas, *eba* = *yera*, *ebas* = *yeras*, etz. Exemplo: *estes eban pastorez* 'istos yeran pastoréz'; *de cuan eba yo zagal*. A omofonía se soluziona en a escritura con una *h* (etimoloxía) en o berbo *aber*. Asinas, *heba* = *eba*, cast. 'había'. Exemplos: *no te'l heba contáu*, *qu'heban masáu*.

Atras trazas son cheneráls en l'aragonés, u reflexan una pre-nunzia local típica d'Estadilla. Asinas, s'achuntan à l'aragonés común os imperfeutos d'indicatibo: *feba*, *sabeba*, *removeba*, *podeba*, *quereba*, *teniba* 'teneba', *diba* 'diziba', etz. Y también os imperfectos de suchuntibo: *sabese*, *querese*, *dase*, *servise*, *comprendese*, *ises*, *escribisen*, *tenises* 'teneses', *puðise*, etz. En o berbo *aber* se troban dos formas: a más normal ye *hese*, *hesen* (también sin d'h: *eses*), fren à *habese*, que se puede beyer bella bez (*ñ'habese*).

En os preséns irregulárs se beyen, chunto à formas comuns en l'aragonés, bellas formas ribagorzanas y mesmo peculiárs d'o charrar d'Estadilla. Meteré n'un cuadro os más importáns, seguntes as formas replegadas en os poemas:

<i>fer</i> (fé)		<i>aber</i> (abé)		<i>ser</i> (sé)	
Ind.	such.	Ind.	such.	Ind.	such.
<i>foy</i>	<i>feiga</i>	<i>he</i>	<i>heiga</i>	<i>soy</i>	<i>seiga</i>
<i>fas</i>	<i>feigas</i>	<i>has</i>	<i>heigas</i>	<i>es</i>	<i>seigas</i>
<i>fa</i>	<i>feiga</i>	<i>ha</i>	<i>heiga</i>	<i>é</i>	<i>seiga</i>
<i>fen</i>	<i>feigán</i>	<i>hen/emos</i>	<i>heigán</i>	<i>semos (!)</i>	—
<i>fez</i>	<i>feigáz</i>	<i>hez</i>	<i>heigáz</i>	<i>soz</i>	<i>seigáz</i>
<i>fan</i>	<i>féigan</i>	<i>han</i>	<i>héigan</i>	<i>son</i>	<i>seigan</i>

<i>ir (i)</i>		<i>beyer (vé)</i>		<i>tener (tení)</i>	
Ind.	such.	Ind.	such.	Ind.	such.
<i>voy</i>	<i>veiga</i>	<i>veigo</i>	<i>veiga</i>	<i>tiengo</i>	<i>tienga</i>
<i>vas</i>	<i>veigas</i>	<i>veis</i>	<i>veigas</i>	<i>tiens</i>	<i>tiengas</i>
<i>va</i>	<i>veiga</i>	<i>vey</i>	<i>veiga</i>	—	<i>tienga</i>
<i>ín</i>	<i>veigámos</i>	—	<i>veigán</i>	<i>tenín</i>	<i>tiengán</i>
<i>íz/vaz</i>	<i>veigáz</i>	—	<i>veigáz</i>	<i>teníz</i>	<i>tiengáz</i>
<i>van</i>	<i>véigan</i>	<i>veyen</i>	<i>véigan</i>	<i>tienen</i>	<i>tiengan</i>

Atras formas de presén que cal cuaternar son: *puez* 'puedes'; *esteigan* 'estén', feito seguramen por analoxía u contaminación de formas como *seiga*, *heiga*, *feiga*, etz. O presén d'o berbo *ir*, conchugáu como reflexibo, ye normal: *me'n voy*, *te'n vas*, *se'n va*, *tos n'iz*.

De tó lo dito se puede deduzir que bi'n ha, por o menos, as siguiéns omofonías:

— Preséns de suchuntibo de *ir* y de *beyer*.

— Imperfeutos d'indicatibo de *aber* y de *ser*.

— Cherundios y primeras presonas de plural d'os preséns d'indicatibo (*ín*, *fen...*).

— Y antiparti: imperatibos (presona busatros) y segundas presonas de plural d'os preséns d'indicatibo: *saliz* 'salid' / 'salís', *fez* 'haced' / 'hacéis'...

c) *Aspeutos sintauticos*.—Bels aspectos que rozan a sintaxis s'han bistos ya (construcción *lo ye*, empleo de *i* y *ne*, concordancia plural de *chen*, etz.). Se podaban añadir dos notas:

— Construcción *en* + infinitibo, que ye normal en aragonés y qu'indica una azió puntual. Podeda corresponder, alto u baxo, à o castellano *al* + infinitibo: *se pensan qu'en vení aquí; y en salí del estudio / i a chugá*.

— Un caso interesán de concordanzia berbal: *cuan la vista tenderé*, 'cuan tienda la bista'. Ye una construcción con futuro d'indicatibo, igual como en francés. En castellano se fa siempre con presén de suchuntibo, que ye o modo berbal que demanda l'alberbio *cuan*, charrando d'una azió futura dende o presén.

Faint, illegible text, possibly bleed-through from the reverse side of the page. The text is arranged in several paragraphs and appears to be a formal document or report.

BIBLIOGRAFÍA

A bibliografía ye prou curta y se reduce à chiquéz artículos en rebistas u periódicos. Señalo primero bellas obras de l'autor publicadas y dimpués os artículos sobre er u a suya obra.

a) De Cleto Torrodellas.

A la armitaña de la sierra de la Carrodilla. «Heraldo de Ribagorza», Graus, zaguera dezena de chulio de 1927.

El banco viejo de los viejos. «Aragón», febrero de 1936, páginas 37-38.

El banco viejo de los viejos. «Argensola», número 29 (tomo VIII), I trimestre de 1957, pp. 67-70.

Diez días antes de San Lorenzo; Felicitación; Graus y «El Ribagorzano»; El banco viejo de los viejos. «Fuellas», número 9, mayo de 1979, pp. 4-6.

No se cuanternan as fuellas y pliegos sueltos impresos.

Fa poco tiempo s'ha publicáu un libré que replega tóz os triballos suyos en ribagorzano:

TORRODELLAS, CLETO, *Versos y romances en ribagorzano*. Introducción, notas y vocabulario por Francho Nagore. Publicazións d'o Consello d'a Fabla Aragonesa, Uesca, 1979.

b) Sobre Cleto Torrodellas.

«Arcoiz», *Cleto Torrodellas, poeta ribagorzano*. «El Ribagorzano», número 227, Graus, 3 diciembre 1913, p. 4.

ARAG, LUIS M.^a, *Flores de Montaña*, «en Aragón», 1930.

ARTAZOS, MIGUEL A., *La poesía de Cleto Torrodellas*.

CISTUÉ DE CASTRO, PABLO, *Un poeta rural en tierra ribagorzana*. «La Voz de Aragón», Zaragoza, 10 de mayo de 1929.

CISTUÉ DE CASTRO, PABLO, *Un gran «romancero» ribagorzano, herrero y hortelano*. «Heraldo de Aragón», 24 septiembre de 1978.

Cleto. «Buñero» (Boletín de l'asoziazión de recreo e instruzión «La Aurora», d'Estadilla), número 4.

Cleto, poeta ribagorzano. «Hoja del Lunes», de Zaragoza, 2 de abril de 1979.

Cuidén lo nuestro. «Buñero», número 4.

GARCÉS CONSTANTE, *Un diccionario inédito sobre folklore ribagorzano*. «Heraldo de Aragón», 24 de septiembre de 1978.

«Fidel», *Tiempo nuestro* (bersos en ribagorzano en que charra de Cleto). «Buñero», número 4.

MUR, LUIS, *Cleto Torrodellas Español*. «Aragón». (Revista d'o S. I. P. A.), Zaragoza, febrero de 1936, pp. 37-38.

NAGORE, FRANCHO, *O ferrero d'Estadilla, poeta popular*. «Fuellas». (Fuellas d'informazió d'o Consello d'a fabla aragonesa), número 9, mayo de 1979, pp. 2-3.

OTTO, NICOLÁS S. DE, *Lamentaciones de un bardo que envejece*. «El Noticiero», 24? de chulio de 1926.

QUINTILLA, ANTONIO, *El alma de una región. Vida y sentido en la entraña ribagorzana*. «Heraldo de Aragón», 6 de diciembre de 1951.

QUINTILLA SARRADELL, ANTONIO, *Un poeta ribagorzano: Cleto Torrodellas Español*. «Argensola», número 27 (tomo VII), II trimestre de 1956, pp. 267-270.

SANCHO, FRANCHA, *Lo que me ban contá de Cleto*. «Fuellas», número 9, mayo de 1979, pp. 6 y 16.

SANCHO, FRANCHA, *Omenaxe à Cleto Torrodellas en Estadilla*. «Fuellas», número 10, chunio de 1979, p. 2.

E N D I Z E

	Páginas
Cleto Torrodellas. A suya bida.....	5
A suya obra	11
O baxo-ribagorzano. A fabla d'Estadilla	21
Bibliografía	29



Instituto de Estudios Altoaragoneses



27127